

06. Yong'inni avtomatik tarzda o'chirish va yong'in signalizatsiyasi qurilmalarini montaj qilish, sozlash, ta'mirlash hamda ularga texnik xizmat ko'rsatish faoliyatini amalga oshirish talablari va shartlari

Talablar:

1. Yuridik shaxs - doimiy shtatida elektronika va asbobsozlik, informatika va axborot texnologiyalari va elektrotexnika sohasida "muhandislik" yo'nalishi bo'yicha oliy ma'lumotga shuningdek, ushbu yo'nalishlar bo'yicha kamida uch yil ish stajiga hamda yong'inni avtomatik tarzda o'chirish va yong'in signalizatsiyasi qurilmalarini montaj qilish, sozlash, ta'mirlash va ularga texnik xizmat ko'rsatish yo'nalishlari bo'yicha maxsus tayyorgarlikka ega bo'lgan ishlarning rahbari mavjud bo'lishi.

2. Ishlar rahbari tegishli ixtisoslik bo'yicha har to'rt yilda kamida bir marotaba maxsus tayyorgarlikdan o'tib malakasini oshirishi va buni tasdiqlovchi tegishli hujjatga ega bo'lishi.

3. Ish bajaruvchilar yuridik shaxsning doimiy shtatida bo'lishi va quyidagilarga ega bo'lishlari kerak:

yong'inni avtomatik tarzda o'chirish tizimlarini montaj qilish, sozlash, ta'mirlash hamda ularga texnik xizmat ko'rsatish yo'nalishi bo'yicha: elektr payvandlash (gaz bilan payvandlash) yoki sanitariya-texnik vositalarni o'rnatishda 4-razryaddan past bo'lmasligi;

yong'in signalizatsiyasi qurilmalarini montaj qilish, sozlash, ta'mirlash hamda ularga texnik xizmat ko'rsatish yo'nalishi bo'yicha: elektronika va elektrotexnika sohasida 3-razryaddan past bo'lmasligi.

Shu bilan birga, profilda maxsus tayyorgarlik yoki maxsus kurslardan o'tganligini tasdiqlovchi hujjat (*sertifikat, guvohnoma va boshqalar*)ga ega bo'lishi kerak.

4. Yuridik shaxs ayrim ishlarni bajarish uchun jalb etilayotgan subpudrat tashkilot mutaxassislarini tegishli kasb-hunar yoki texnik ma'lumoti va malakasi razryadini o'zaro shartnoma tuzishda ko'rsatib o'tishi shart.

5. Xabardor etish tartibidagi faoliyatni amalga oshirish uchun quyidagi moddiy-texnika baza, asbob-uskunalar va boshqa texnik vositalarning mavjud bo'lishi:

- kombinasiyalashtirilgan pribor;
- megometr;
- shumomer;
- elektr kavsharlagich (*elektropayalnik*);
- elektr perforator;
- elektr pirmadasta (*elektrodrel*);
- chilangar asboblari to'plami;
- elektr montaj asboblari to'plami;
- montaj qiluvchining kaskasi;
- montaj qiluvchining belbog'i;
- narvon;
- ikki yoqqa ochiladigan narvon;

kompessor (*yong'inni avtomatik tarzda o'chirish faoliyati uchun tadbir etiladi*), loyiha smeta hujjatlarini saqlash uchun seyf, 20 kv.m.dan kam bo'lmagan xizmat xonasi, 20 kv.m.dan kam bo'lmagan asbob-uskunalarini va texnik vositalarni saqlash uchun xona yoki maxsus ajratilgan joy. Bunda o'lchash vositalari metrologik tekshiruv (qiyoslash) natijalari bo'yicha muvofiqlik sertifikatlariga ega bo'lishi hamda ushbu sertifikat muddatlari amalda bo'lishi lozim.

6. Xabardor qiluvchi tomonidan yong'inni avtomatik tarzda o'chirish va yong'in signalizatsiya qurilmalarini montaj qilish, sozlash, ta'mirlash va ularga texnik xizmat ko'rsatish faoliyati turi bilan shug'ullanishda, xabardor etish sohasidagi qonun hujjatlariga, normativ hujjatlar va standartlar talablariga rioya etishi va quyidagi normativ-huquqiy va normativ-texnik hujjatlarning mavjud bo'lishi:

RDPB 01-001:2007 «Avtomatik yong'in o'chirish qurilmalari. O'rnatishga talablar va qabul qilish»;

RDPB 01-002:2007 «Yong'in xabargohlarni o'rnatish. O'rnatishga talablar va qabul qilish»;

RDPB 01-003:2008 «Yong'in avtomatikasi qurilmalari. Texnik xizmat ko'rsatish va rejali ehtiyot ta'mirlash»;

RDPB 01-004:2010 «Avtomatik yong'in o'chirish qurilmalari, yong'in va qo'riqlash signalizatsiyalari. Shartli grafik belgisi»;

SHNQ 2.04.09-2007 «Bino va inshootlarning yong'in avtomatikasi».

7. Yong'inni avtomatik tarzda o'chirish va yong'in signalizatsiya qurilmalarini montaj qilish yuzasidan topshirilgan ob'ektlarni hisobini (reestrini) olib borish va ularni ishlatishning butun davrida loyihalarning va boshqa hujjatlarning (yoki ularning nusxalarining) saqlanishini ta'minlashi;

8. Ishlarni bajarish vaqtida ishlatiladigan mahsulotlar va materiallar loyihaning o'ziga xos xususiyatlariga, davlat standartlariga, texnik shartlarga muvofiq, hamda tegishli sertifikatlariga va texnik pasportlarga ega bo'lishi.

9. Xabardor qiluvchi tomonidan obyektlarda o'rnatilgan yong'inni avtomatik tarzda o'chirish, yong'in signalizatsiya qurilmalari to'g'risidagi axborotlarning, shuningdek, obyektning qo'riqlash va uning xavfsizligini ta'minlash tizimi to'g'risida xabardor etish faoliyatini amalga oshirish jarayonida ma'lum bo'lib qolgan boshqa ma'lumotlarni muhofaza qilishga yo'naltirilgan chora-tadbirlarning ko'rilishi.

10. Qurilmalarni montaj qilish jarayonida buyurtmachi va Davlat yong'in nazorati organlari bilan kelishmasdan, loyihaviy yechimlar yoki ko'rik dalolatnomasidan chetga chiqish man etiladi.

11. Yong'inni avtomatik tarzda o'chirish va yong'in signalizatsiya qurilmalarining texnik vositalarini montaj qilish, sozlash, ta'mirlash hamda ularga texnik xizmat ko'rsatish ishlari jarayonida ushbu sohada mavjud bo'lgan yo'riqnoma va normativ hujjatlarda belgilangan talablarga rioya etish, shu bilan birga ishlab chiqarish hujjatlarini tuzish va olib borishi.